

A Tx'an Is Babel Carta San Pablo

BAY TIMOTEO

Is yichbanil carta Pablo

1 ¹Ayin ton Pablo in, chekbej in Jesucristo, yujtol axca tu' yaloncan Dios co Colomal, c'al Cham Jajawil Jesucristo, Cham chi jaoc yipok co c'ul. ²Ach Timoteo, ti chi watok jun in carta ti' ayach. Axca tol in c'ajol ach, yujtol wuj xan max aoc a c'ul yin Cristo. Yak'okabc'al co Mam Dios c'al Cham Jajawil Jesucristo is watx'c'ulal ayach. Ok'okab c'ul en, cax yak'okab c'apax is junc'ulal ayach bay tu'.

Is tenbanil oc waan yob cuybanil

³Caw chi wochej chach can bay conob Efeso tu', axcata' max wut tewok in ba ayach, yet max in toj bay Macedonia, yujtol chi wochej chi cam wal alon bay juntzan cuywajwom, tol c'amokabxa chi cuywaj eb yin tx'ok cuybanilejal. ⁴Chal bay eb tol manchakxa yaoc eb c'ul yin comon abix, c'al yin txolilal yabixal yichmam eb, tol c'am lajubal. Comonc'al chi teyelej aj ba eb yuj yin nabac'al. A juntzan abix tu', c'am yopiso con is cuyon yin tzet chi yochej Dios chi junej, ma yin jaon oc co c'ul yin.

⁵Chi waltok jun chekbanil ti abej, yet watx' ok ajwal can camc'ulal eb creyente bay tu'. Ta chi tojlonej oc ba eb, ta c'am chi tzulay eb yuj yikbomal is nabal, ta caw yel chi yaoc eb c'ul yin Dios, ok ajwal can is camc'ulal eb tu'. ⁶Palta ay eb chi bekoncan juntzan watx' beybalej chi waltek ti'. Yuj tu' xan comonxac'al chi yaoc eb nabal yin comon k'anej c'am yelapnok. ⁷Chi yochej eb chi oc mextolal yin ley Moisés. Caxe'al chi tz'ak tec'baj ba eb yaloni, palta c'am chi nachaj el yuj eb tzet chi yala'.

⁸Jotak tol ay yopiso ley Moisés tu' ta chi jikej tzet chi yala'. ⁹Ojtaknej elok tol man yujok eb watx' beybal xan max ak'laycan jun ley tu', palta yuj eb ok waltek ti' xan max ak'laycanok: Yuj eb tenomtak chi yut ba bay Dios, eb man yikemok chi yut ba bay tzet chi yala', eb c'am chi beybalnen axca chi yochej Dios, eb yob is beybal, eb c'am yelapnok Cham yul sat, eb comonc'al chi

buchwaj yin junok tzet yetal watx', eb chi mak' cam is mam c'al is txutx, c'al eb chi mak' cam juntzanxa yet animail, ¹⁰eb ajmul, eb chi yun mul yetok yet winakil, eb elk'om anima, eb lek'ti, eb chi naaj k'anej yin yet animail, chi yal elapnok eb chi beybalnen tzet yetal c'am chi cha ba yetok cuybej caw yel. Yuj eb, xan max ak'laycan jun ley tu'. ¹¹A jun cuybanilej caw yel ti', a ton k'anejal yet colbanilej ti' max yak'can Dios ayin yuj walon elok. A jun ti', miman yelapnok. A chi alontek yabixal Dios, Cham cac'al ti' chi tzaloji.

Max ok' c'ul Dios yin cham Pablo

¹²Ayoc Cham Jajawil Jesucristo wetok yin wopiso ti'. Chi wal yuj diosalil bay Cham, yujtol yikem in yul sat Cham yala'. Yuj tu' xan max yak' wopiso wak'on serbil. ¹³A yet yalan xin, buchwajwom in yin Cristo. Caw max wak' yobc'ulal yin, toltax bajwajnak in yin, palta max ok' c'ul Dios win, yujtol maj nachaj el wuj tzet chi el wuneni, yujtol c'amto chi waoc Cham yin in c'ul yet tu'. ¹⁴Caw miman watx'c'ulal Cham Jajawil max tx'ox ayin. Max yak' waoc in c'ul yin, cax max yak'on c'apax in came'ulal, axcac'al chi yut yak'on ayon junjun on, yujtol junxanej jayji yetok Cristo Jesús.

¹⁵Ay jun tzet caw yel ok wala', cax moj wal chi co cha' jabej. Ulnak ec' Jesucristo yulyibank'inal ti', yuj ul colon el eb yobtakwom. Ec'ban yobtakwom in xol eb yobtakwom tu'. ¹⁶Yuj ton tu' xan max ok' c'ul Dios win, yet watx' axc'a oc win chi txecloj elok tol ay is mimanc'ulal Jesucristo. Xan tx'oxbanil wayji bay jantak eb tolto ok yaoc c'ul yin, yet watx' chi cha' c'apax eb is k'inal tol ayc'al yin tojbalk'inal. ¹⁷A Dios, Yajaw yayji yin tojbalk'inal. C'am bak'in ok cam Cham. C'am junok mac chi je' yilon oc yin. Asan jun Dios ti', cax c'am junokxa. Mimanokab yelapnok Cham yul co sat. Jalek watx' k'anej bay yin tojbalk'inal. Yunokabi.

¹⁸Ach Timoteo, came'ulnebil ach wuj axca tol in c'ajol ach. Chi waltok juntzan chekbanil ti' ayach, yet watx' ok ot mulnaj a ba axca max yun chekon Dios yal-lay en. Yuj tu', axca wal junok soldado caw watx' chi yut ba yin is yopiso, caytu' chot ak'on ep a mulnaj yin yet Dios. Tec'anc'al chot aon oc yin a c'ul tzet max a cha abej. Chac'al ab tzet chi yal yikbomal a nabal. ¹⁹Ay eb c'amxa chi cha yab tzet chi yal yikbomal is nabal, xan mayal etax el eb yin tzet chi yaoc eb yin c'ul. ²⁰A Himeneo yetok Alejandro, caytu' max yut ba eb. Yuj tu' max waoc eb yul k'ab Satanás, yet watx' chi yojtaknej el eb tol c'am chi je' chi jal buchwal k'anej yin Dios.

Tzetbil chi yun yoc txaj

2 ¹A tinani', tix tzet chi babji walontok ayach ti'. Yowalil chon tewi bay Dios, chon txajli yuj masanil anima. Yowalil chi co k'an bay Cham, cax chi jak'on c'apax yuj diosalil yuj eb anima tu'. ²Yowalil chon txajli yuj eb mimek yajaw, c'al yuj eb yajaw masanil, yet watx' chon beytok yin numanil, c'al yin masanc'ulalil. Yuj tu' ok je' jaon wal oc co ba yul k'ab Dios, cax ok je' co beybalnen bayc'al ijanil.

³Ta axca tu' yayji, watx' yul sat Dios co Colomal, cax caw chi tzaloj Cham yuj. ⁴Yujtol chi yochej Cham chi colchaj masanil anima, c'al yojtaknen el eb jun cuybej acaw yel. ⁵Asan jun Dios ay, cax asan c'apax jun yaomal oc co ti' bay, a ton Jesucristo, a ton Cham max oc animail, ⁶ul yak'nak ba camok, yet watx' chi je' colchaj masanil anima yuj. A yet max jay tiempoal jun ti', max al-lay el yabixal. ⁷Wal yel chi wala', c'am chin naajok tol max ak'lay wopiso walon el jun abix ti'. Max quin alay oc chekbejok Jesucristo, yuj in cuyon eb man israelok yin cuybej acaw yel, yet watx' chi yaoc eb c'ul yin Cham.

⁸Yuj tu', chi wochej chi txajli eb winak bay junjun lugar. A eb chi yiaj k'ab can cax chi txajli, yowalilokab watx' is beybal eb yul sat Dios. C'amokab chichonc'ulal eb. Manokab ak'om owalok eb. ⁹A eb ix ix, bayc'al ijanokab chi yut pichon ba eb ix, tojolokab chi yut yaon oc eb ix is pichil. Manokab ayxa mayok chi yut eb is xil. Manchak luesnej ba eb yaon oc ch'en oro chi tzekeki yili, c'al ch'en ch'en yelxac'al can is tojol. Manchak luesnej ba eb yetok pichilej yelxac'al can is tojol. ¹⁰A ti yet eb, aokab watx' beybalej chi tx'oxil eb, a ton beybalej moj chi beybalnej eb ix ix chi oc ayilal bay Dios. ¹¹Yabokab eb ix ix cuybanil yin ayilal, cax tz'inc'alokab xi eb ix. ¹²Ayin chi wala' tol c'am chi je' cuywaj eb ix xol winak. Maj je' tol a eb ix ok ak'on mandar winak. Abxalwokokab eb ix yin tol c'am chi yaltok eb ix yet. ¹³Yujtol babel watx'nebil Adán yuj Dios. Tzunaniixa watx'nebil Eva. ¹⁴Manak Adán max ilay aytek sat yuj nak diablo, palta a Eva, xan a ix max ayc'ay yin tenomtakil bay Dios. ¹⁵Caxc'al chi yab eb ix yailal yalji unin yuj, palta ok colchaj yanimail eb ix, ta chi yaoc eb ix Dios yin c'ul, ta ay is camc'ulal eb ix, ta watx' beybal eb ix yul sat Dios, ta chi yak' cuenta ba eb ix.

Is beybal eb anciano

3 ¹A junxa k'anej ok waltok ayach ti', caw wal yel. Ta ay mac chi yochej chi oc yilomalok yet creyenteal, watx' jun mulnajil chi yochej eb chi yun tu'. ²Ok waltek tzet yowalil chi el beybalnen eb chi oc yin jun opiso tu'. C'amokab bay chi el yunen eb junok tzet yetal man watx'ok, yet watx' c'am tzet yin chi je' yak'lay queja eb. Yowalil tol junnejokab yistzil eb. Tec'anokabc'al chi yut eb is nabal, yak'okabc'al cuenta ba eb. Yowalilokab watx'c'al chi yut eb is beybal satak yet animail, ak'om posadaokab eb. Watx'okab chi yut cuyon eb eb yet creyenteal. ³Manokab uquemanok eb. Manokab mak'wajwomok eb. Watx'okab c'ul eb. Manokab ak'om owalok eb. Manokab asannejok yin ak'oj ganar tumin ayoc nabal eb. ⁴Watx'okab yak'on cuenta ba eb yul yatut, yet watx' yikemokabc'al yuninal eb bay, yet watx' ayokab yelapnok eb yul sat yuninal tu'. ⁵A mac man yojtakok tzet chi yut yak'on cuenta ba yul yatut, ¿tom ato wal yak'on cuenta yiglesia Dios ok je' yuj? ⁶A eb unin creyente, c'amto chi je' yalay oc yopiso eb, yujtol ay is

may chi yi' can ba eb. Ta chi yi' can ba eb, ay is may chi alay oc is yailal eb, axca max utlay nak diablo. ⁷A eb ayoc yopiso, yowalilokab watx' chi yut eb beybal satak eb man creyenteok, yet watx' c'am chi buchlay eb, c'al yet watx' c'am chi ayc'ay eb yul is trampa nak diablo.

Is beybal eb diácono

⁸Ti chi wal c'apaxtok ayach tzet yowalil chi el beybalnen eb diácono. Yowalil tol watx'okab chi yut eb beybal satak yet animail. Manokab cabok is ti' eb. Manokab uq'uemanok eb. C'amokab chi yi' eb tumin yin tzet man watx'ok. ⁹Yowalil caw chi yaoc eb nabal yin juntzan cuybej ak'bil ayon yuj Dios, juntzan bay chi jaoc co c'ul. Yuj tu' yowalilokab chi cha yab eb tzet chi yal yikbomal is nabal. ¹⁰Beyc'ulnelayokab eb chi oc diáconoal tu' babelal. Ta c'am is paltail eb chi ilchaji, chi je' yalay oc yopiso eb. ¹¹Ac'ala' c'apax eb ix ix chi oc yopiso, yowalil watx'okab chi yut eb ix is beybal satak yet animail. Manokab alom k'umalok eb. Yowalil tec'anokab chi yut eb is nabal. Yetok c'apaxok, yikemokabc'al chi yut ba eb ix watx'nen masanil tzet chi cheklay watx'nej. ¹²Junnejokab yistzil junjun diácono. Watx'okab yak'on cuenta ba eb yul yatut. ¹³Ta watx' yilon eb diácono tu' yopiso, miman yelapnok eb yul sat yet creyenteal, cax c'am chi xiw eb yaloni tol ayoc Cristo Jesús yin is c'ul.

Ak'bil jojtaknej co cuybanil.

¹⁴Chin toj ayach tu' yet jayeb c'u. ¹⁵Palta ta c'uxan chi mayji wapni, yuj tu' chin tz'ibejtok jun in carta ti' ayach, yet watx' chojtaknej elok tzet chi el oten a beybal yul yatut Dios, a ton yiglesia Cham Dios iquis. A yiglesia tu' ay yopiso yoc yipomalok cuybanilej caw yel. ¹⁶Wal yel, caw miman yelapnok co cuybanil ak'bil jojtaknej el yuj Dios. Chi yal axca ti': Max tx'oxaj ba Dios yin mimanilejal yet anima. Axa Cham Espíritu tx'oxnak elok, tol caw tojol is nabal. Ilbil Cham yuj eb ángel, albil el yabixal bay xolak nación. Ay eb yet yulyibank'inal ti' max yaoc c'ul yin. Yetok c'apaxok max ilay paxaj Cham satcan.

Ay creyente ok yican el ba yin is creyenteal

4 ¹Yin jichanil chi yut yalon Cham Yespíritu Dios, tol a yet lananxa jay lajub tiempoal, ay eb ok yican el ba yin creyenteal, cax axa yin cuybej man yelok ok yaoc eb nabal. A juntzan cuybej tu', cuybej demonio. ²Ok yacabaj eb txiquin yaben tzet chi yal anima lek'ti'. Cabsat juntzan eb anima tu'. Junelnej wal tol etaxnak el nabal eb sic'libil. ³Ok tz'ak yal eb axca ti': Ay yowalil chi oc jetbi. Ay juntzan tzet ay yowalil co looni, xi eb, ok tz'ak yalon eb lek'ti' tu'. Palta a Dios watx'nenej juntzan tzetax yetal tu', yuj co loon ayon creyente on ti'. Yuj tu' xan a yet chi co looni, chi jal yuj diosalil bay Dios yuj, yujtol jojtakxa jun cuybej acaw yel. ⁴Masanil tzet watx'nebil yuj Dios, watx'c'al elok. Yuj tu', c'am chi je' jaloni tol ay

tzet man watx'ok yul sat. Chi je' co loon masanil tzetak yetal, asan tol chi jal yuj diosalil bay Dios yuj. ⁵Ta chon txajli, cax chi jalon yuj diosalil yuj tzet chi co lo' tu', c'am yowalil, yujtol caytu' yalon k'anej Dios.

Is beybal eb chekbej Jesucristo

⁶Ta ok ak' juntzan cuybej ti' cuy eb creyente bay tu', cax chak'on ep yin a cuyon a ba alon juntzan k'anej chi jaoc yin co c'ul, a ton juntzan cuybej caw watx' bay ayoc co nabal, watx' chekbej Jesucristo ach chi yal tu'. ⁷Palta manchak a cha' ab juntzan comon abix c'am yelapnok. Ac'al oc a nabal yin Dios. ⁸Ta chi co k'aytzej co mimanil yet watx' ay jip, watx' toni; palta yelxac'al ec'ban watx'il ta chi jaoc co nabal yin Dios. Ta caytu' chi jut co ba, ay is watx'il ok co cha' bay yulyibank'inal ti', c'al bay satcan. ⁹A jun cuybej ti', caw wal yel. Moj chi co cha' jab yin masanil co c'ul. ¹⁰Yujc'al ton jun ti', xan chi jiajteq co c'ulok jak'on jip co mulnaj yin yet Dios, yujtol a Cham Dios iquis chi jaoc yipok co c'ul. A Dios, is Colomal masanil anima yayji. A eb chi yaoc c'ul yin, ok colchaj eb yuj.

¹¹A juntzan tzet chi waltok ayach ti', caw chi cam alon bay eb creyente bay tu', cax cha cuyon eb yin. ¹²Watx'c'al chot a ba satak eb creyente masanil, yet watx' c'am mac chach alon uninal. Watx' chot k'anjab a ba bay eb. Watx' chot a ba satak eb. Watx' chot a camc'ulnen eb. Asannejokab Cham Jajawil chaoc yin a c'ul. Tojolc'al chot a nabal yil eb, yet watx' caytu' chot a tx'oxon watx' beybalej yil eb bay tu'. ¹³Yak'ban chin apni, ak' ep awten tx'an k'anej Dios yab eb. Chak' ep a jekon oc nabal eb, c'al a cuyon eb. ¹⁴Manchak a bek ilnej opiso ak'bil yuj Dios yet max batxban ajtok eb anciano k'ab yiban a jolom. A Dios ak'nej nachaj el yuj eb tol ok ach k'anbalnej, xan max ak'lay c'apax ojtaknej elok tzet ok ot ak'on serbil.

¹⁵Caw chaoc juntzan chi waltok ayach ti' yin a c'ul, yet watx' ok yil eb masanil bay tu', tol cac'al ti' eon ep junjun c'u. ¹⁶Taynej a ba, cax chi cam eloni tzet cuybanilejal chak' cuy eb. Tec'anc'al chot a ba yet watx' ok a col a ba, cax ok colchaj c'apax eb chi aben tzet chala'.

A tzet moj chi beybalnej masanil eb creyente

5 ¹Manchak a tzu eb cham ichamtak winak. Jek oc nabal eb yin watx'c'ulalil axca chot alon junok tzet yetal bay a mam. C'al bay eb nak ach'ejtak winak, watx'c'al chot alon yab eb nak, axca chot alon yab junok caw oxtak. ²Ac'ala' c'apax bay eb xal ixnamil ix, watx' chot alon yab eb axca chot alon yab a txutx. C'al bay eb ix k'opoj ix, watx'c'al chot alon yab eb, axca bay junok acaw anab. Manokab cab satok chot k'anjab a ba bay eb.

³Chi wal c'apaxtok juntzan chekbanil ti' ayach yuj eb ix ix camnakxa yichamil. A ton eb junelnej wal tol tx'oklil, yowalil chon colwaj bay eb ix.

⁴Ta ay eb ix ay yune', ma yitxiquin, yowalil cha cuy eb uneej tu' c'al eb

itxiquinej tu', tol a eb cuenta yak'on colwal bay is mam, c'al bay is txutx, yuj yak'on eb pak tzet max ak'lay bay eb. Ta chi beybalnej eb axca ti', caw watx' yul sat Dios. ⁵Ay eb xal chi cam yichamil, cax caw yel tol tx'oklilxac'al, asanxanej Dios chi yaoc eb yipok c'ul. C'ualil c'al ak'balil txajc'al chi yun eb bay Dios, yuj k'anon eb tzet chi k'anabax oc yuj. ⁶Palta ay eb xal camnakxa yichamil chi yak' is nabal yin tzet chi yochej c'ul. Caxc'al iquis eb tu' yul sat anima, palta yul sat Dios camnak el eb. ⁷Chi cam alon juntzan cuybej ti' bay eb xal bay tu', yet watx' c'amokab mac yob tzet chi alon yin eb. ⁸Ta ay eb creyente c'am chi colwaj bay is mam, c'al bay is txutx, ma bay is mam yican, c'al bay eb ayic' yetok yul yatut, titol c'am jabok yelapnok cuybej Cristo bay eb chi yal tu', cax ec'ban yobal eb yintak eb man creyenteok.

⁹A eb xal camnakxa yichamil ok waltek ti', chi je' yoc eb cargook iglesia: Eb xal ayxa 60 abil is k'inal, eb xal tol c'amc'al bay max say is mul yul k'ab yichamil. ¹⁰Eb xal miman txequel tol watx' is beybal satak yet creyenteal. Eb watx' max yut yilon ch'ib yune', eb xal max beybalnej ak'oj posada. Eb max yak' serbil yet creyenteal yin ayilal, eb max colwaj bay eb ayoc yin yailal, eb watx'c'al tzet chi el yuneni. Asan ton eb xal ti' chi je' yoc cargook iglesia.

¹¹A pax eb ix k'opoj ixto xin, cax chi cam yichamil, man a chaoc eb cargook iglesia. Yujtol ay eb, a wal tzet chi yochej c'ul chi beybalnej, cax chi bekoncan eb Cristo. Asan junokxa yichamil eb chi na'. ¹²Ok beyc'ulnelay eb, yujtol c'am chi yikej eb bay max yak' is ti'. ¹³Yetok c'apaxok, chi yilil eb ix isajil. Asanxanej k'anej chi yil yun eb ix xolak na. Man asannejok tol chi yilil eb ix isajil, palta chi yil c'apax el eb ix wajoj k'anej, cax comon chi yaltok eb ix yet xol junok tzet yetal bay c'am yalon yet, cax chi yalon c'apax eb ix tzet man watx'ok. ¹⁴Yuj tu' xan chi wochej tol a eb ix k'opoj ixto camnakxa yichamil, watx' chi yi' eb ix junokxa yichamil. Unewokokab eb ix. Yak'okab cuenta eb ix yul yatut. Ta chi yikej eb axca walon ti', c'am tzet chi je' yalon eb ajc'ul jin yuj eb ix. ¹⁵Chi waltok juntzan ti' ayach, yujtol ay eb ix camnakxa yichamil meltzojnakxa yintak. Axa Satanás chi yak' serbil eb ix tinani'.

¹⁶A jantak creyente aj lugar bay tu', caxc'al winak, ma ix, ta ay junok xal ix camnakxa yichamil ayic' yintak, yowalil chi colwaj eb bay xal. Yujtol man moxok ta a iglesia chi cargonon eb. Asan eb xal caw is tx'oklil, a eb mox chi col-lay yuj iglesia, yujtol maj tzakay iglesia cuentananen eb xal masanil.

¹⁷A eb anciano watx' yak'on cuenta yet creyenteal, yowalil ayokab ay yelapnok eb yul sat yet creyenteal masanil. Mawal eb chi yak' yip cuywaji, c'al yalon el k'anej Dios, yelxac'al ec'ban yelapnok eb. ¹⁸Yujtol xi tx'an Un axca ti': Manchak e yaoc pa yin ti no no' yet chi tec'wi trigo, xi. Cax chi yalon c'apax tx'an axca ti': A mac chi mulnaji, mox chaon is tojol, xi.

¹⁹Ta ay mac chi ak'on queja junok anciano, yowalil ayokab cawanok, ma oxwanok testigo. Ta c'am cawan oxwan testigo tu', man a cha' ab tzet

chi al-lay aj yin tu'. ²⁰Ta ay mac c'am chi bekcan yunen yobtakil, cha tenchanej satak eb creyente masanil, yet watx' chi xiw eb masanil yoc is yobtakil.

²¹Satak Dios, yetok satak Jesucristo, c'al satak eb is yángel sic'bilcan el yuj, chi cam walontok ayach, tol chekej juntzan chekbanilej ti', yin tol c'am a q'uexanc'ulal yin junjun. ²²Man comonok chaoc yopiso junok mactxel yin ayman, yet c'amto chi cam elon is beybal, yujtol axa talaj chi yunajok, chach locaytok xol is yobtakil. I el a ba yin tzanc'al tzet man watx'ok.

²³Chi waltok ayach yuj a c'ul, ilab tol ya'c'al. Manokab asannejok aej choq'uej. Chi je' oq'uen jabok vino, yet watx' chi watx'ji a c'ul tu'.

²⁴Ay mac miman txequelxa is yobtakil yet manto beyc'ulnelayok. Ay mac xin, masantac'al chi beyc'ulnelayi, catatu' chi txcloj aj is yobtakil. ²⁵Cay c'apax tu' eb watx' is beybal, miman txequelxa eb tol watx' is beybal eb. Ta ay eb watx' is beybal c'amto chi txcloj elok, yowalil ok txclojc'alta' el eb.

6 ¹Chi wal c'apaxtok ayach yuj eb creyente ayoc yin mosejal. Mimanokab yelapnok patrón eb yul sat, yet watx' c'am chi buchlay Dios, c'al co cuybej bay ayoc co nabal yuj beybal eb. ²Ta ay eb ayoc yin mosejal yintak yet creyenteal, mimanokabc'alta' yelapnok yul sat eb. Watx'okab chi yut mulnaj ba eb bay, yujtol yet creyenteal ba eb yetok mac ay tzet chi yi' yin is mulnajil eb, xan camc'ulnelayokab eb yuj eb. Chi cam alon juntzan chekbanil ti' bay eb, cax cha cuyon eb yin.

Manchak jaoc co nabal yin beyomal

³A cuybej Cham Jajawil Jesucristo caw yel, palta ay mac c'am chi yaoc c'ul yin juntzan cuybej tu'. Tx'ok cuybej chi el yalon eb. C'am chi yochej eb juntzan cuybej chi alon tzet chi jut jaon oc co nabal yin Dios. ⁴A mac axca tu' chi yut ba, c'am jabok tzet yojtak eb, toc'al chi maynej ba eb. Chi yochej eb comon chi yak'lej owal yetok junokxa mactxel. Chi yochej c'apax eb chi teyelej ba yin juntzan k'anej. Asan juntzan ti' chi yilc'al yun eb. Palta yuj ton juntzan tzet chi el yunen eb tu', xan chi pitzc'oj aj chichonc'ulal, owal, buchwal, yob nabalejal, c'al teyelejbail. ⁵Axca ton ti' chi yut ba eb etaxnak el is nabal, eb c'amxa chi yaoc nabal yin cuybej acaw yel. Chi yochej eb chi yi' eb tumin yin co cuybanil. ⁶Yel, miman ton watx'il chi ji' yin co cuybanil, ta chi jak' tzalobjok co c'ul yetok tzet ayon. ⁷A yet chon alji, c'am jabok tzet ibil oc juj chon jayi. Ac'ala' c'apax yet ok on paxok, c'am jabok tzet ok je' jiontok bay yulyibank'inal ti'. ⁸Yuj tu', ta ay tzet chi co lo' cax ta ay co pichil, tzalajokonek. ⁹Akxa tinani', ay creyente asannejok beyomal chi yochej. Yuj ton tu' xan c'un yak'lay etax el eb yuj tzet man watx'ok. Axca tol chi ayc'ay eb yul junok trampa, yujtol xiwil juntzan tzet c'am yopiso chi yochej oc eb. Caw ay is may chi etax el eb yuj. Yuj juntzan tzet chi yochej oc eb tu', xan chi etax el nabal eb junelnej. Yuj tu' caytu' ok yun c'aycan el eb. ¹⁰Ta pek' on yin ch'en tumin, chi je' chon toj yin tzanc'al tzet makanil yobtakil yuj

ch'en. Ay eb asan tumin chi yochej ocok. Yuj tu' xan max bekcan eb juntzan cuybej bay max tz'ak yalej oc c'ul. Mimek cusc'ulal wal max yitek eb yiban.

Tec'anokab chi jut jaon oc co c'ul yin Jesucristo

¹¹Ach Timoteo, tol yet achxa Dios, ontawal juntzan tzet c'am watx'il max waltek ti'. Tojole'al chot a beybal. Asanokab yin Dios chaoc a c'ul, c'al a nabal. Ayokab a camc'ulal. Tec'baj a ba aben yail. Yaynakil chot a ba.

¹²Axca junok soldado caw tec'an chi yut ba, cayokab tu' chot aon oc a c'ul yin Cham Jajawil. Axca ti' chot a chaon a k'inal tol ayc'al yin tojbalk'inal. Yuj a chaon a k'inal tu', xan max ach yawtej oc Dios yetok. Caw watx' max ot alon satak masanil eb max aben aloni, tol Jajawil ton Jesucristo.

¹³Satak Dios, Cham ak'om k'inalaj, c'al satak Jesucristo, tol watx' max yut yak'on ba testigoal satak Poncio Pilato, chi cam walontok ayach, ¹⁴tol caw chekej juntzan chekbanil ti' sic'libil. Watx'c'al chot a beybal, masantac'al chi jay Cham Jajawil Jesucristo. ¹⁵Ato yet ok jay jun tiempoal tol nabil yuj Dios, catatu' ok tx'oxon aj Jesucristo. Yujtol asan Dios ay is yikbej, cax tzalojc'ulalc'al ay. A ton Dios Rey al eb rey, c'al Yajawil eb yajaw c'apaxok.

¹⁶Asan Dios man cambejalok yayji. Xol sakk'inal ay Cham. C'am junok mac chi je' yapni is c'atan. C'amto junok mac maxax ilon yin Dios, yujtol c'am junok mac chi je' yoc t'anan yin. Mimanokab yelapnok Cham yul co sat. Ayokab yikbej Cham yul co sat yin tojbalk'inal. Yunokabi.

¹⁷Al juntzan chekbanil ok waltek ti' bay eb creyente beyom yin tzetak yetal bay yulyibank'inal ti'. Chi cam alon yab eb, tol manchak maynej ba eb. Manchak yaoc eb beyomal tu' yipok c'ul, yujtol man tojbalk'inalok ay. Cax chalon bay eb tol asanokab Dios chi yaoc eb yipok c'ul. Yujtol a Cham chi ak'on masanil tzet ayon, yuj jak'on tzalojbok co c'ul yin tzet chi yak' ayon tu'. ¹⁸Chal bay eb, tol watx' chi yut eb is beybal, xiwil tzet watx' chi je' el yunen eb. Colwajokab eb bay eb meba', bekanokab chi yut eb c'ul sawaj bay eb. ¹⁹Ta chi beybalnej eb axca chi wal ti', ok wajbaj eb tzet ok yi' eb yet yajtok tu', ok yi' c'apax eb jun acaw k'inalaj.

Is lajub chekbanil Timoteo chi yaltok Pablo

²⁰Ach Timoteo, taynejc'al tzet max abenelay oc yul a k'ab. Ay eb comonc'al chi yal tzetak yetal nabac'al. Caw c'am jabok yelapnok tzet chi yal eb chi yaloc ba jelanil tu'. Besil a ba xol eb. ²¹Yujtol ay eb chi yaoc c'ul yin juntzan lek'tial chi yal eb tu'. Yuj tu', xan chi bekcan eb cuybej max yaoc yin c'ul yin babelal.

Yak'okabc'al Dios is watx'c'ulal ayach bay tu'.